

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XL No. 7
Abril 7, 2009
www.philippinerevolution.net

Editorial

Padayon nga nagapadihut si Arroyo para magkapyot sa gahum

Nagahimo si Gloria Arroyo sang mahigko kag makahas nga padihot sa nagakaladasma niya nga pagpangita sang pamaagi para padayon nga magkapyot sa poder pagkatapos sang 2010. Mapa-*cha-cha* man ukon mapa-eleksyon, may mga reserba nga baraha si Arroyo nga tanan naman nabisto.


Bisan makapila ka beses na nga ginsikway sang pumuluyo kag nag-atras na pati ang pila niya ka alyado, tuso nga ginaduso gihapon sang sakon sa gahum nga mga idu-ido ni Arroyo ang *cha-cha* sa Kongreso. Ginapabugal sining karon lang sang partido KAMPI ni Arroyo nga baynte ka pirma na lang ang kinahanglan para pormal nga maaprubahan ang resolusyon ni Rep. Luis Villafuerte agud bag-uhon ang konstitusyon sang 1987 paagi sa pagtransporma sang Kongreso pakadto sa *constituent assembly* (*con-ass*), magpartisi-par man ukon indi ang mga senador.

Katuwang sini, nagpadihot man si Speaker Prospero Nograles sang resolusyon sa Manubo nga Panalغان para ibasura ang probisyon sa konstitusyon nga nagadumili sa dumuluong nga pagpanag-iyang mga kadutaan kag negosyo sa pungsod. Ang resolusyon nga ini ginapaguwa niya nga isa ka "simple nga pang-ekonomya nga resolusyon lang" bisan ginasurender sini ang pungsodnon nga patrimonya kag interes. Ginapamilit niya nga ipasar na lang ini sang Manubo nga Panalغان bilang ordinaryo nga lehislasyon. Katuyuan sini nga hawanan ang dalan para sa iban pa nga resolusyon pangunahon na ang pagbag-o sa sistema

sang gubyerno pakadto sa parlamentaryo nga magahatag-dalan sa pagpabilin ni Arroyo sa poder bilang puno nga ministro.

Ang ginalauman nga pagpamatuk sang Senado kag iban pa nga organisasyon kag personahe sa *con-ass* ipabasura sa Korte Suprema, gamit ang kontrol ni Arroyo sa mayorya sang mga mahistrado. Hayag katama ang katuyuan sang resolusyon nga ginaduso ni Villafuerte, labi na ang nagapanguna sa pagpangita sang mga pirma para diri amo ang mga kongresista nga anak ni Arroyo nga sanday Jose Miguel kag Diosdado.

Pakuno-kuno nga nagadistansya ang Malacañang sa mga padihot nga *cha-cha* sang mga anak kag idu-ido ni Arroyo sa Kongreso. Nakita sini nga samtang labi nga ginapamilit ang *cha-cha* labi lamang nga nagakahamulag ang hubon Arroyo. Pero indi man kuno



**Mga tampok
sa isyu nga ini...**

**Mga kadalag-an batuk
sa Oplan Bantay Laya 2**
PAHINA 3

**Isa ka biktima sg pasista
nga pagpamatay kada
simana**
PAHINA 8

**Wala pulos ang mga
resolusyon sg G20**
PAHINA 9


sini pag-upangan ang anuman nga “inisyatiba” halin sa Manubo nga Panalغان. Bisan ginaako sang Comelec nga ipit na ang panahon, pilit gihapon ini nga nagapangita subong sang pamaagi agud matigayon ang plebisito bahin sa pagbag-o sa konstitusyon kadungan sa 2010 eleksyon ukon mas temprano pa. Ini pananglitan nga “maaprubahan” sang Kongreso ang *cha-cha* antes liwat ini nga magbakasyon sa Hunyo kag gilayon ini nga aprubahan sang Korte Suprema.

Pananglitan indi makalagas ang *cha-cha* kag obligado nga padayunon ang eleksyon sa 2010, ginapreparahan ni Arroyo ang lain-lain nga tuso nga padihot nga nakasakay man sa eleksyon. Isa na diri ang pagsuporta sa isa ka kandidato sa pagkapresidente nga magapasugot nga mangin tawu-tawo lamang samtang si Arroyo ang matuod gihapon nga magauyat sa gahum.

Ginapalutaw subong ang ngalan ni Defense Secretary Gilbert Teodoro bilang kandidato sa pagkapangulo sang nagahari nga hubon. Si Teodoro hinablos ni Eduardo “Danding” Cojuangco Jr., isa sa

pinakadaku nga burges kumprador sa pungsod nga nangin alyado sang tanan nga nagahari nga rehimen halin pa sadtong panahon ni Marcos.

Sa pagpalutaw sang ngalan ni Teodoro, tuyo ni Arroyo nga magpadayon ang suporta ni Cojuangco sa nagahari nga hubon. Bilang padya sa padayon nga suporta ni Cojuangco, ginbaligya sa iya sang gubyrno ang mga sapi sini sa Meralco sa kundisyon nga mamag-an para sa iya (pagabayaran niya sang hulugan kag wala sang interes ang mga sapi sa sulod sang tatlo ka tuig). Kabahin man sang padihot nga ini ang pagkunsabuhay nanday Arroyo kag Cojuangco nga agawon sa ulihi ang kontrol sa Meralco halin sa mga Lopez para mapaluya ang gahum sa masmidya kag pulitika sang pamilya nga ini nga anti-Arroyo. Antes pa ini, naghimbunanay ang duha para ibaligya kay Cojuangco ang sekwestrado nga 27% sapi sang Coconut Producers Federation Inc. sa San Miguel Corporation (SMC) kag para malubos na ang monopolyo nga kontrol ni Cojuangco sa SMC. Indi lang ugaling ini mapatuman sang gilayon bangud sa mga kaso nga ginpasaka sa



Korte Suprema sang mga mangu-nguma kag iban pa nga nagabalag sa pagbaligya.

Kadungan sini, plano man magpadalagan ni Arroyo bilang tiglawas sang isa ka distrito sa Pampanga kag mangin House Speaker paagi sa mga boto sang iya mga idu-ido nga ginasaligan niya makauyat liwat sa mayorya nga mga pwesto sa Kongreso. Sandig sa iya plano, si Arroyo kag indi si Teodoro ang matuod nga magauyat sang gahum. Si Teodoro kag ang mga alyado ni Arroyo sa Manubo nga Panalغان ang lauman niya nga magasiguro sa *cha-cha* kag magahawan sa dalan para pormal na nga magabutang sa ulihi si Arroyo bilang puno nga ministro sa idalom sang sistemang parlamentaryo. Hayagan nga gindeklarar ni Teodoro nga ang pagsulong sang *cha-cha* ang pangunahon nga kaundan sang iya plataporma.

Indi malikawan ni National Security Adviser Norberto Gonzales nga ipabatyag sa publiko ang padihot nga ini. Siling niya, magakinahanglan kuno sang “transisyon nga pangulo” ang pungsod sa sulod sang duha ukon tatlo ka tuig pagkatapos sang termino ni Arroyo para malatag ang mga kinahanglanon nga pagbag-o pareho sang *cha-cha*. Dapat handa kuno nga magsakripisyo ang nasambit nga “transisyon nga pangulo,” bangud temprano siya nga magapanaog sa poder agud hatagandalan ang bag-o nga pinuno sang pungsod sa idalom sang sistemang parlamentaryo. Indi man sambiton



Tuig XL No. 7 Abril 7, 2009

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial: Padayon nga nagapadihot si Arroyo para magkapyot sa gahum	1
Mga kadalag-an batuk sa OBL2	3
Madinalag-on nga opensiba sg BHB	
Kaaway, nag-agum sg 25 kaswalti	5
3 bihag nga pulis, ginhilway sg BHB	6
Pagbasura sa kaso batuk kay Ka Joema	7
Pagpanghalit sg pasistang estado	
Kada simana, 1 biktima sg pagpamatay	8
Mga ginkasuhan sa pagpatay kay Rebelyn	9
Mga imbolbado sa pagpatay kay Rebelyn, labi nga nagtum-ok sa kaugalingon	10
2 gindukot nga gerilya sa Mindanao	10
Mga resolusyon sg G20, wala pulos	12
Mainit nga protesta sa pulong sg G20	12
Balita	13

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

ni Gonzales, si Gloria Arroyo ang ginatumod niya nga pinuno.

Bisan pa man, may peligro para kay Arroyo ang padihot nga ini bangud daku ang posibilidad nga indi na magsugot ang mga Cojuangco sa papel nila bilang "manughimo sang hari" kag gusuhon nila nga hayagan nga uya-tan ang gahum.

Isa pa ka baraha sang Malacañang sa eleksyon amo ang *automated elections* kag ang daku nga posibilidad nga magapalyar ang bag-o nga sistema nga ini. Gina-paguwa nga paagi kuno sa *automation* ukon de-kompyuter nga pagboto kag pag-isip sang mga boto para kuno madula ang pagdinaya sa piniliay. Pero suno sa mga progresibong syentista kag iban pa nga mga eksperto nga nagtuon sa disensyo nga pagagamiton para sa *automation*, nagaguwa nga hungod nga tuman kadamo ang buslot sini. Parte sang disenyo ang sistematiko kag lapnagon nga pagdinaya para masiguro ang pagdaog sang mga kandidato sang nagahari nga grupo.

Kon indi pa mag-obra ang pagdinaya para masiguro ang ila pagdaog, hingalitan ang dalagku kag lapnagon nga pagsalangisag sa paggamit sini agud madeklarar sang Comelec nga napaslawan ang eleksyon sa pungsodnon nga lebel. Magaserbi ini nga "ligal" nga rason para mapabilin nga presidente si Arroyo tubtub indi pa mahiwat ang espesyal nga eleksyon kag mapadayon ang *cha-cha*.

Mas malala pa diri, ang matuga nga kinagamo mahimo pa nga himuon nga tungtungan ni Arroyo para magdeklarar sang *state of emergency* ukon hayagan nga layi militar. Mapaslawan lang ang mga maitom nga padihot nga ini paagi sa nagapadayon kag determinado nga paghulag sang malapad nga prente para mapukan ang rehimeng Arroyo. AB

Sa ika-40 anibersaryo sang BHB

Bulawanong kadalag-an batuk sa Oplan Bantay Laya 2



Liwat nga ginpamatud-an sang Bag-ong Hangaway sang Banwa (BHB) kag bug-os nga rebolusyonaryong hublag ang kusog kag likasarang sini nga lampuwasan ang mabangis nga atake sang reaksyunaryong rehimen sining nagligad nga tuig. Sa pihak sang ginpasingki nga kontra-rebolusyonaryong kampanya militar sang rehimeng US-Arroyo sa balayon sang Oplan Bantay Laya 2 (OBL2), naglapad ang BHB, nagdalom ang pag-ugat sa pumuluyo kag labi pa nga nagbaskog ang ikasarang sini nga maglunsar sang mga taktikal nga opensiba batuk sa mga armadong grupo sang reaksyon.

Ang masunod ang nakalap nga mga report sang *Ang Bayan*:

Sa Mindanao. Sa bilog nga Mindanao, nahulagan na sang BHB ang masobra 2,000 baryo sa 200 banwa kag syudad kag 19 ka prubinsya. Nagdamo ang mga prenteng gerilya halin 35 sadtong 2004 pakadto 40 subong nga tuig. Wala bisan isa ka prenteng gerilya nga nalusaw sa pihak sang ginapasingki kag dalagkuan nga operasyon militar sang AFP.

Halin Marso 2008 tubtub Marso 2009, nakalunsar sang masobra 300 taktikal nga opensiba ang BHB sa isla kag nakaagaw ini sang masobra 350 armas. Indi lang pila ang nabihag kag napasurrender sini nga mga regular kag paramilitar nga tropa sang Armed Forces of

the Philippines (AFP) kag Philippine National Police (PNP), lakip ang pila ka mataas nga upisyal. Naglab-ot sa pila ka gatos ang natuga sini nga kaswalti sa kaaway, lunsay napatay kag napilasan. Sa Northeast kag Southern Mindanao pa lang, nagalab-ot sa 400 ang kaswalti sang kaaway, lakip ang 153 napatay sa mga armadong aksyon sang BHB.

Naglab-ot na sa pila ka libo ang mga hangaway sang BHB sa bilog nga Mindanao. Nagapadayon nga nagadamo ang mga platun kag namentenar ang mga pormasyon nga kumpanya sa pila ka lugar. Ginatos ang nag-entra subong nga tuig sa BHB halin sa mga organisasyong masa sa kaumhan, amo man halin sa kubay sang mga aktibista

sa syudad, partikular halin sa kubay sang pamatan-on-estudyante.

Uyat ang kusog sang BHB, naga-padayon nga nagalapad kag nagabaskog ang gahum sang demokratiko nga gubyerno sang pumuluyo sa sulod sang mga prenteng gerilya. May ara na nga nagatindog nga mga organo sang gahum pangpulitika sa lebel munisipal kag lebel inter-baryo kag madamu-damo na ang lebel baryo. Nagalab-ot sa 600,000 ang baseng masa sang mga ini.

Pila ka pulo ka libo nga mangunguma ang nakabenepisyo sa mga ginlunsar nga rebolusyong agraryo. Ginatos ka mga baryo ang madinalag-on nga napapanubo sang renta sa duta, renta sa galingan kag usura. Napataas nila ang suhol sang mga mamumugon sa uma kag presyo sang mga produkto sang mga mangunguma kag napapanubo ang mga presyo sang mga produkto nga ginakonsumo nila. Napauswag man ang produksyon paagi sa pagtukod sang mga grupong bululigan, komunal kag iban pa nga klase sang kooperatiba.

Padayon nga napangapinan ang mga duta sang katigulangan sang mga Lumad kag Moro batuk sa malaparan nga pagpang-agaw sang dalagku nga burgesya kumprador, agalon nga mayduta kag dalagku nga dumuluong nga korporasyon.

Nangin madinalag-on man ang mga kampanya nga ginlunsar sa mga baryo. Lakip diri ang mga kampanya sa ikaayong-lawas, literasiya kag pangkultura nga mapagsik nga ginapasakupan sang masa. Ginatos ang nakabenepisyo sa ginlunsar nga mga klinika sang pumuluyo.

Padayon nga naglapad ang mga milisya sang pumuluyo. Sa mga abanse nga baryo, may nagatindog nga minimum tig-isa ka iskward sang milisya nga aktibo sa lain-lain nga hilikuton militar.

Sa NEMR. Sa North Eastern Mindanao Region, sa partikular,

naglapad sang 19% ang ginaskop na nga mga baryo sang BHB. Sakop na sini ang tanan nga mga estratehikong lugar sa rehiyon. Nagtaas sang 35% ang numero sang mga organisadong masa samtang nagalapnag sa mga sentrong banwa kag syudad ang impluwensya sang BHB.

Lakip sa mga kadalag-an sang BHB kag rebolusyonaryong hublag sa rehiyon ang pagpahulag sa pumuluyo para sa rebolusyong agraryo sa benepisyo sang nagalab-ot sa 80,000 pumuluyo. Napanubo ang mga renta sa duta, gamit sa produksyon kag interes sa usura. Napataas ang suhol sang mga mamumugon sa uma kag presyo sang mga produktong agrikultural samtang napapanubo naman ang presyo sang mga produkto nga ginakonsumo sang pumuluyo. Sa pila ka lugar, madinalag-on nga nadepensahan ang kinamatarung sang pumuluyong Lumad para sa kaugalingon nga determinasyon. Napalapad ang pagbuligay kag alyansa sa mga nahanunga nga pwersa, lakip ang mga maki-pumuluyo nga pulitiko kag mga upisyal sa burukrasya. Bangud diri, napalig-on pa ang Pulang gahum sang pumuluyo sa rehiyon.

Nagdaku sang 10% ang numero sang mga Pulang hangaway. Halin Enero 2008 tuhtub Marso 2009, naglab-ot sa 84 taktikal nga opensiba ang nalunsar sang mga Pulang hangaway sa rehiyon—halin sa mga isla sang Siargao tuhtub sa Tubay, Agusan del Norte tuhtub Tagasaka, Hinatuan, Surigao del Sur. Nakaagaw ang BHB sang mataas nga kalibreng armas para sa isa ka regular nga platoon. Naglab-ot sa isa ka kumpanya ang numero sang mga napatay sa kaaway samtang pito ang namartir sa kubay sang mga Pulang hangaway. Nagpursiger ang BHB nga ipreserbar ang pagpalapad kag konsolidasyon sang mga base kag paglunsar sang rebolusyong agraryo samtang na-

gapasanyog sa hilikuton militar.

Sa Eastern Visayas. Tampok nga kadalag-an sang BHB sa Eastern Visayas ang pagpaslaw sini sa OBL2 sang rehimeng US-Arroyo. Baliskad sa ginapabugal sang AFP nga nalutos na sini ang rebolusyonaryong kahublagan sa rehiyon, wala bisan isa ka yunit sang BHB ang nawasak. Ini sa pihak sang dalagku nga operasyon militar nga ginlunsar sang AFP sa rehiyon.

Sadtong 2008, nakalunsar ang BHB diri sang masobra 60 armadong aksyon, kon sa diin 75 tropa sang kaaway ang napatay kag pila ka gatos pa ang napilasan.

Sa Panay. Naglapad sang 30% ang baseng masa sang rebolusyonaryong hublag sadtong nagligad nga tuig kag nagtaas ang ikasarang sang mga organisasyon sini. Nagtukod sang bag-o nga asosasyon sang mga mangunguma nga amo ang nagahanas sa pumuluyo sa paglubad sang mga problema sa baryo halin sa produksyon, kasulayan kag kalinungan, edukasyon kag ikaayong-lawas. Ang mga rebolusyonaryong organisasyon nga ini amo man ang nagatindog nga mga taludtod sang pumuluyo para pangapinan ang ila mga duta, lakip ang mga kadutaan sang katigulangan sang mga Tumanduk sa ginatuyo agawon sang 3rd ID sang Philippine Army. Nagdamo pa ang mga baryo kag sentrong banwa nga nasakop sang BHB—lunsay sa daan kag ginarekober nga mga lugar.

Halin 2002, masobra doble na ang gindaku sang numero sang mga Pulang hangaway kag nagalab-ot sa duha ka batalyon ang lokal nga milisya. Nakalunsar ang BHB diri sang 66 taktikal nga opensiba kon sa diin 40 kaaway ang napatay kag 46 saring armas ang naagaw.

Sa Negros. Napangibabawan sang BHB ang isa sa pinakamabaskog nga atake sang AFP sa kasaysayan sang rebolusyonaryong hublag sa rehiyon. Isa sa mga pray-



oridad sang rehimeng US-Arroyo ang Negros sa idalom sang OBL2 kag sandig sa plano sini, gindumog sang lain-lain nga yunit militar ang isla para dugmukon ang rebolusyonaryong hublag diri. Pero sa baylo nga malutos, padayon nga nagbaskog ang rebolusyonaryong hublag diri. Nakalunsar ang BHB sa Negros sang 51 taktikal nga opensiba, mas madamo kumparar sadtong nagligad nga mga tinuig. Kadungan sini, padayon nga nagadako ang numero sang mga gerilya sang pumuluyo kag nagalapad ang mga prenteng gerilya kag baseng masa.

Sa Southern Tagalog. Wala bisan isa ka prenteng gerilya ang naghapa sa mga prubinsya nga ginkonsentran sang OBL2 sa rehiyon. Ang pila ka temporaryo nga kahalitan nga natuga sini indi bangud sa dalagku nga operasyon militar kundi bangud pa sa mga internal nga problema sa organisasyon kag pila ka sayup nga polisiya. Natun-an sang BHB diri ang mga partikular nga kinaiya sang OBL2 sa rehiyon kag nakahimo sang nagakaigo na nga mga tikang para pamatukan ini.

Nangin bubon sang manggaranon nga ekspersyensa sang mga rebolusyonaryong pwersa sa isla sang Mindoro nga nag-atubang sa malala nga kabudlayan kag kahalitan sa idalom sang OBL1 sa pagpamuno sadto ni Col. Jovito Palparan. Hulu-halintang nga ginbawi sang rebolusyonaryong hublag sa isla ang mga nabuhian nga sakop kag nagapadayon nga nakatipon sang kusog.

Napaslawan man ang rehimeng US-Arroyo nga dugmukon ang mga prenteng gerilya sa Quezon bisan matapos ang serye sang mga kampanya sang paglikop kag pagwasak nga ginlunsar sini sa prubinsya.

Ang ulihi nga anum ka bulan sang nagligad nga tuig ang pinakamabungahon nga bahin sa pagpaslaw sang OBL2 sa rehiyon. Lakip sa mga pinakamatingkad nga taktikal nga opensiba ang madinalag-on nga reyds sa Quezon Provincial Jail nga naghilway sa pito ka detenido pulitikal kag ambus sa Rodriguez, Rizal. Maluwas diri, nakalunsar man sang 19 daku kag gamay nga taktikal nga opensiba kon sa diin nakaagaw ang BHB sa rehiyon sang 71 armas. Baynte syete sini ang mabaskog nga kalibreng riple. Duha ka suldado sang AFP ang napatay, anum ang napilasan kag tatlo ka upisyal sang pulisya ang nabihag sang BHB.

Samtang, padayon nga nabeneplisyuhan sang rebolusyonaryong pumuluyo sa sulod sang sona kag mga prenteng gerilya ang signipikanteng kadalagan sang rebolusyong agraryo. Napaslawan diri ang mga ma-niobra sang mga kontra-rebolusyonaryong grupo pareho sang Akbayan nga tuyo nga tiplangan ang pumuluyo sa ila mga repormista nga kabuangan kaangot sang reaksyunaryo nga reporma sa duha.

AB

Kaaway, nag-agum sang 25 nga kaswalti

Nag-agum sang 25 nga kaswalti ang mga armadong tinawo sang reaksyunaryong guberno, lakip ang 21 tropa nga napatay sa lain-lain nga mga aksyong militar sang Bag-ong Hanga-way sang Banwa (BHB) sa Bicol, Panay kag Southern Mindanao sining hingapusan sang Marso. Duha ka pistola man ang naagaw sang BHB halin sa mga bandido nga RPA sa Negros.

Abril 1. Tatlo ka elemento sang Scout Rangers kag 31st IB ang napatay kag duha pa ang napilasan sang lambatan sila sang mga Pulang hangaway bandang alas-4:30 sang hapon sa Upper Sta. Cruz, Ragay, Camarines Sur. Nakasakay sila sa apat nga motorsiklo pakadto sa sentrong banwa sang Ragay sang ambuson sila sang BHB.



Marso 31. Isa ka elemento sang 47th IB sang Philippine Army ang napatay kag duha pa ka suldado ang napilasan sang maengkwentro nila ang isa ka yunit sang BHB alas-11:55 sang aga sa Barangay Buri, Tapaz, Capiz. Nagalunsar sang operasyon militar ang mga suldado sang matabo ang inaway.

Marso 27. Lima ang nakumpirma nga napatay sa bahin sang kaaway sang ambuson sang Tomas Pilapil Command sang BHB ang isa ka pangpatrulya nga salakyan pangdagat sang Philippine Army sa naaminhan nga parte sang Lagonoy, Camarines Sur mga alas-9 sang aga. Nag-angkon man sang indi pa maisip nga numero sang mga pilason ang kaaway. Wala sang kaswalti sa bahin sang BHB.

Antes sini, anum ang napatay nga suldado sang palukpan sang isa ka iskwad sang mga Pulang hangaway ang detatsment sang 7th Scout Ranger Company sa San Isidro, Bulan, Sorsogon bandang ala-una sang kaaganhon.

Marso 26. Tatlo ka elemento sang Scout Rangers ang napatay sang maagaw sang isa ka platoon sang BHB sa Sityo Binilangan, Barangay Bulacao, Gubat, Sorsogon ang inisyatiba halin sa nagasalakay nga




mas o menos 20 suldado. Naglawig sang 20 minutos ang inaway antes hilway nga nakaatras ang bilog nga pwersa sang BHB. Para indi mahuyan, pilit nga ginapaguwa sang Scout Rangers nga mga bangkay kuno sang mga gerilya ang ginsakay nila sa isa ka siksabay paguwa sa Barangay Bulacao.

Marso 25. Isa ka suldado sang AFP ang napilasan sang maengkentro sang 15 minutos ang mga pwersang gerilya sang BHB ang mga elemento sang 28th IB sa Sityo Tagaras, Barangay Maragtas, Lupon, Davao Oriental.

Samtang, isa ka elemento sang CAFGU naman ang napatay kag madamo nga iban pa ang napilasan sa isa ka inaway sa tunga sang BHB kag militar sa Baganga, Davao Oriental sadtong una nga simana sang Marso.

Marso 22-23. Duha ka magkasunod nga operasyong hasment ang ginlunsar sang BHB batuk sa mga tropa sang 901st Bde nga nagatigayon sang mga "pulung-pulong" sa Barangay Sta. Cruz kag Barangay Trece Martires sa Casiguran, Sorsogon. Duha ang namonitor nga napatay sa bahin sang kaaway sa walo ka minutos nga hasment, samtang hilway nga nakaatras ang mga Pulang hangaway.

Marso 11. Ginreyd sang isa ka yunit sang BHB ang mga balay nanday Fernando Aninang, anay punong barangay sang Panguiranan sa banwa sang Balud, Masbate kag sang subong nga punong barangay sini. Nakakumpiska ang mga ge-



3 bihag nga pulis, ginhilway sang BHB

Ginhilway sang Narciso Antazo Aramil Command sang Bag-ong Hangaway sang Banwa (NAAC-BHB) ang tatlo ka pulis nga nabihag sa isa ka inaway sadtong Enero 3 sa Rodriguez, Rizal. Sining Marso 27, sanday Insp. Rex Cuntapay, P01 Marvin Agasen kag P01 Alberto Umali ginpasa kanday Bishop Gabriel Reyes sang dyosesis sang Antipolo, Sen. Consuelo "Jamby" Madrigal, mga upisyal sang prubinsya sang Rizal kag mga tiglawas sang International Committee of the Red Cross.

Nadayon ang paghilway sa tatlo ka pulis sa pihak sang mabaskog nga operasyon militar nga ginalunsar sang AFP kag PNP. Sa maayo nga kahimtangan ang tatlo sang sila ginhilway sang BHB sa isa ka mabulubukid nga lugar sang Rizal.

Suno sa tatlo ka pulis, gintrato sila sang maayo sang BHB sa sulod sang 83 adlaw sang ila pagkabihag. Daku ang pagpasalamat sang mga kapamilya sang tatlo ka pulis sa ginhimo nga paghilway sang BHB.

Napamatud-an nga indi imbolbado sa mga makasiligni nga krimen batuk sa pumuluyo ang tatlo ka pulis base sa imbestigasyon nga ginhimo sang BHB. Gindayaw ni Ka Fidel Agcaoili, tagapamaba sang National Democratic Front of the Philippines (NDFP) Negotiating Panel, ang mga Pulang hangaway kag kumander sang NAAC-BHB, Sen. Madrigal, Gov. Casimiro Ynares III, Bishop Gabriel Reyes sang Antipolo City, Bishop Emilio Marquez sang Lucena City kag ang ICRC sa pagbulig sa pagpahilway sang tatlo ka bihag sang gera.

Kaangot sini, nanawagan si Agcaoili sa rehimeng Arroyo nga tani tumbasan sini ang pagkamakatawo kag maayo sang buot nga ginpakita sang NDFP paagi sa paghilway sa nabilanggo nga mga konsultant sini ukon pagtuhaw kon indi man pag-ako nga sa kamot nila ang nadula nga mga kaupod agud masuguran ang liwat nga pagbukas sang pormal nga sugilanon pangkalinungan.

AB

rilya sang mga armas nga ginagamit nanday Aninang kag mga tinawo sini sa ilegal nga pangisda. Ginalakipan ini sang isa ka M16, isa ka karbin, duha ka pistola nga kalibre .45, isa ka pistola nga 9mm, isa ka riple nga kalibre .22, duha ka *shotgun* (isa diri *home-made*) kag lain-lain nga magasin kag bala. Si Aninang kag mga tinawo niya nagaserbi man nga mga *asset* sang Balud-PNP kag sang 506th Provincial Mobile Group batuk sa rebolusyonaryong hublag. Kada bulan nagahatag sila sang kwarta para sa proteksyon sang PNP sa Balud kag sa Camp Boni Serrano.

Marso 5. Duha ka kalibre .45 pistola, mga dokumento kag iban nga kagamitan ang naagaw sang BHB sang salakayon sang isa ka yunit sang Leonardo Panaligan Command sang BHB ang hedkwarters sang bandido nga grupong Revolutionary Proletarian Army (RPA) sa Barangay Hibaiyo, Guihulngan, Negros Oriental. Ang reyde pagsilut sa RPA sa pagpang-abuso sini sa pumuluyo.

Madugay na nga ginareklamo sang mga lokal nga residente ang pagpangilkil sang RPA sang P50 kada simana kag P500 nga multa kon indi sila makatambong sa mga miting nga ginapatawag sang RPA.

Ang RPA nagaserbi nga pwera pangseguridad sang pamilya Chan, ang tag-iya sang Hacienda Paz kag tagaprotekta sa *cockfarm* sang ila punong kumander nga si Stephen Paduano (alyas Carapali Lualhati).

Ginaagaw man sang RPA ang

kadutaan sang mga lehitimo nga benepisyaryo sang reporma sa duta paagi sang pagbaylo sang mga titulo sini sang mga paltik nga titulo. Bangud diri, madamo nga mangunguma nga madugay na nga nagatalauma sa ila talamnan ang

nadulaan sang duta.

Ginagamit man sang Philippine Army ang RPA bilang mga yunit paniktik, mga giya sa operasyon kag sa pagsabwag sang kakulba kag intriga sa kubay sang pumulyo. AB

Ka Joema, gintamyaw sang PKP sa pagkabasura sang iya kaso

Gintamyaw sang Partido Komunista sang Pilipinas (PKP) kag sang National Democratic Front of the Philippines (NDFP) ang pangulo nga tagapundar sang PKP nga si Jose Maria "Ka Joema" Sison sa madinalag-on nga pagkabasura sadtong Marso 31 sang mga kaso kriminal batuk sa iya nga ginpasaka sa korte sang The Netherlands sadtong 2007. Ginkumpirma ang upisyal nga desisyon nga ini sang Dutch Prosecution Service sa Rotterdam, The Netherlands.

Naangkon ni Ka Joema, 70, ang "desaysibo nga ligal nga kadalag-an" nga ini makali-gad ang serye sang iban pa nga ligal nga kadalag-an batuk sa mga padihot sang mga imperyalista, mga papet nga rehimeng Arroyo kag mga kontra-rebolusyonaryong traidor para hingabuton siya paagi sa pagpasaka sang mga himu-himo nga kaso, suno sa PKP. Bunga ini sang malig-on nga depensananday Ka Joema, mga abugado niya nga Dutch sa pagpanguna ni Michiel Pestman kag suporta sang mga abugado nga Pilipino sa pagpanguna ni Romeo T. Capulong, siling ni Ka Luis Jalandoni, pangulo sang NDFP Peace Panel.

Indi gihapon mabaton ang kapaslawan nga ini sang rehimeng Arroyo kag sang mga pangunahon nga idu-ido sini pareho ni National Security Adviser Norberto Gonzales. Nagpahayag si Gonzales sining Abril 2 nga magapangita kuno sila sang mga paagi para mapatalsik sa The Netherlands si Sison kag mapilitan nga atubangon sini ang igapasaka nga mga kaso kriminal sa Pilipinas. (Napilitan nga magdistyero si Sison sa The Netherlands halin 1987 samtang ara sa "*speaking tour*" sa Europe bangud ginkanselar sang rehimeng Arroyo ang iya pasaporte kag ginbutang siya sa listahan sang mga "*wanted*" nga personahe. Halin sadto wala na siya ginauntatan sang mga kaso kag mga tuyo nga



asasinasyon sang mga ahente sang gubyerno. Ang pinakaulihi amo ang pagdalahig sa iya sa mga kaso sang pagpatay sa mga kontra-rebolusyonaryong traidor nga sanday Romulo Kintanar sadtong 2003 kag Arturo Tabara sadtong 2004.)

Gintawag ni Jalandoni nga tuman ka ignorante si Gonzales sa 1992 kag 1995 nga mga desisyon sang pinakamataas nga administratibong korte sang The Netherlands, ang Raad van State. Ang mga desisyon nga ini ang nagakilala sa istatus ni Ka Joema bilang "*political refugee*" sa idalom sang Artikulo 1A sang "The Refugee Convention." Sakop siya sang lubos nga proteksyon sang Artikulo 3 sang "European Convention on Human Rights and Fundamental Freedoms." Sandig sa nasambit nga artikulo, wala ginatugutan nga ibalik si Ka Joema sa Pilipinas bangud posible nga pabudlayan siya ukon ipaidalom sa indi makatawo nga pagtrato kag pagsilut, paathag ni Jalandoni.

Ginbulgar man ni Jalandoni nga antes pa man arestuhon sang mga Dutch nga pulis sadtong Agosto 28, 2007 si Ka Joema, naghimbunanay ang mga imbestigador sang Dutch sa rehimeng Arroyo, partikular kanday Gen. Eduardo Ermita kag Norberto Gonzales. Ginhimo ang mga himu-himo nga testimonya sa US Embassy, sa Dutch Embassy kag sa anay base militar sang US nga Clark Field (Pampanga), kag amo man sa The Netherlands, para mangin malig-on ang ila himu-himo nga mga asunto. Pero napaslawan ang mga ini.

Si Ka Joema padayon sa paghatag-inspirasyon sa pumuluyong Pilipino para sa paglunsar sang rebolusyon batuk sa mga mapang-ulipon kag mapanghimulos nga sistema sang reaksyunaryong estado sa Pilipinas kag pagpasulong sang proletaryo nga rebolusyon kag anti-imperyalista nga paghimakas sa bilog nga kalibutan, siling sang PKP. AB



Isa ka biktima sang pasista nga pagpamatay kada simana

Liwat nga nagdamo ang mga kaso sang pangpulpitika nga pagpamatay sa pungsod, kag halin Enero may abereyds nga isa ka biktima ini kada simana, suno kay Marie Hilao-Enriquez, pangkabilugan nga sekretaryo sang KARAPATAN. Ginbuyagyag niya ini sa pagbista nga ginhiwat sang Commission on Human Rights (CHR) sining Abril 1 sa kaso nga pagpatay kay Rebelyn Pitao sa Davao City. Si Rebelyn, isa ka maestra, anak sang kilala nga kumander sang Bag-ong Hangaway sang Banwa (BHB) nga si Leoncio "Ka Parago" Pitao. Gindukot, ginpabudlayan kag ginlugos antes patyon si Rebelyn sang mga ahente militar sadtong Marso 4.

Suno sa KARAPATAN, nagalabot na sa 17 ang nadokumento nila nga mga biktima sang ekstrahudisyal nga pagpamatay sa una nga kwarto sining tuig. Masunod ang pila sa pinakabag-o nga kaso sang pasista nga pagpamatay kag iban pa nga abuso militar nga nakalap sang *Ang Bayan*.

Abril 2. Nagalabot sa 500 pamilya halin sa malayo nga barangay sang Alamada, North Cotabato ang naghalin sa ila mga puluy-an para makalikaw sa nagapadayon nga mga inaway sa tunga sang mga pwersa sang gubyernong Arroyo kag Moro Islamic Liberation Front (MILF). Suno sa mga report, nagapasilong ang mga sibilyan sa mga eskwelahan pangpubliko kag mga *barangay hall* sang tatlo ka magkai-ping nga barangay, mga 15 kilometros ang kalayuon halin sa Barangay Upper Dado, kon sa diin nagsugod ang inaway sadtong Marso 31.

Marso 31. Alas-10:45 sang aga sang luthangon sang duha ka berdugo nga nakasakay sa motor-siklo si Edeline "Eden" Jerus, 37, sa iya balay sa Barangay San Juan Roro, Sorsogon City. Ginapakaon niya sadto ang duha niya ka anak nga edad walo kag napulo ka tuig.

Si Jerus, katapu sang Hustisya-Sorsogon, ang mayor nga testigo sa pagpatay sa iya bana nga si Willy, lider sang Kilusang Mag-

bubukid ng Pilipinas sa prubinsya. Ang lider-mangunguma ginbaril kag napatay sadtong Abril 16, 2007.

Marso 25. Mapintas nga ginbungkag ang rali nga ginpangunahan sang mga aktibista sang GABRIELA sa guwa sang US Embassy. Suno sa GABRIELA, mga 20 katawo, kadam-an mga babaye, ang nasakit sang bungkagon sang *anti-riot police* ang ila kubay samtang matawhay nga nagaprotesta batuk sa presensya sang mga tropang Amerikano sa Pilipinas. Nagpasaka sang kaso sang paglapas sa tawhanong-kinamatarung ang grupong GABRIELA batuk sa hepe sang Manila Police District nga si Supt. Roberto Rosales. Ginpasaka nila ang ila reklamo sa Commission on Human Rights kag Office of the Ombudsman.

Marso 23. Ginpatay sang isa ka berdugo nga armado sang kal. 45 pistola si Sabina Ariola, 51, pangulo sang Mamamayan ng Sta. Rosa para sa Kagalingan, Kaunlaran, Kapayapaan, Tungo sa Magandang Kinabukasan ng Bayan (MSRK3). Bandang alas-8:30 sang aga nakasakay sa Isuzu Elf si Ariola pakadto sa plasa sang syudad upod ang mga


istap sang MSRK3 sang luthangon siya sa Barangay Pook, Sta. Rosa, Laguna. Naigo sa tiyan ang lider sang imol sa syudad kag nadala siya sa bululngan pero napatay man pagkagab-i. Ang ginsundan ni Ariola nga pangulo sang MSRK3 nga si Mely Carvajal ginbaril man kag napatay sadtong 2004. Si Ariola ang ika-171 biktima sang ekstrahudisyal nga pagpatay sa Southern Tagalog halin nga nangin presidente si Gloria Arroyo sadtong 2001.

Marso 23. Ginhalughog sang mga suldado sang 22nd IB ang mga balay sa Barangay Togawe, Gubat, Sorsogon. Isa diri amo ang balay nanday Gawo kag Henson Paone. Ginkawatan sila sang mga suldado sang mga bayo kag ginpanglapta ang ila mga gamit. Ginsulod man ang balay ni Moling Estrada kag ginkuhaan siya sang litrato sang militar. Ginpamangkot naman sang mga suldado ang isa pa nga tag-iya sang balay, si Cecilia Herbes, kon sa diin makit-an ang mga katapu sang BHB. Ginkuhaan man siya sang litrato sang militar. Ang paghalughog ginhimo matapos ang duha ka inaway sa tunga sang Philippine Army kag BHB.

Antes pa man matabo ang mga inaway, may gintukod nga Barangay Defense System (BDS) ang militar sang 901st Brigade sa mga barangay sang Casiguran, Sorsogon. Ginapareport man kada aga ang mga tagabaryo nga ginaspetsahan nila nga may angot sa rebolusyonaryong hublag.

Sa mga barangay naman sang Irosin, Sorsogon, naghiwat sang pulung-pulong ang mga militar bahin sa pagtukod sang BDS. Ginapamahog man sang militar ang mga pamilya sang ginadudahan mga katapu sang BHB.

Pebrero 25. Isa ka sibilyan ang napilasan sang palukpan siya kag





ang iya tiyo sang 31st IB samtang nagalikaw nga madalahig sa inaway sa tunga sang militar kag BHB sa San Rafael, Camarines Sur. Sanday Marlo Perez, katapu sang Camarines Sur People's Organization kag barangay kagawad sang San Rafael, kag ang iya tiyo padayon nga ginapalukpan sa pihak sang pagsinggit ni Perez nga sila mga sibilyan.

Nakapalagyo pakadto sa baryo ang iya tiyo para mangayo sang bulig. Ang pilason nga si Perez nagpangayo sang bulig sa mga suldado sang maagyan siya sang mga ini. Pero imbes nga buligan siya sang mga suldado gin-uyatan siya sang mga ini sa kilid nga may igo sang bala, ginpaluhod kag ginsumbag. Ginpalakat sang mga militar si Perez pero bangud maluya na gid siya bangud sa iya pilas, nakadasma siya. Diri siya ginsuguran nga imbestigahon kag pilit nga ginapaako nga katapu sang BHB. Sang ulihi, ginbendahan sang isa ka suldado ang iya pilas. Nag-abot bandang alas-5:30 sang hapon ang mga upisyal sang barangay sang San Rafael kag ila nga gindala pauli si Marlo Perez. Pero sang mag-abot sila sa barangay, pwersahan nga ginkuha si Perez sang mga suldado, ginsakay sa trak sang militar, gindala sa Sipocot District Hospital kag pagkagab-i ginsaylo sa Bicol Medical Center sa Naga City.

Pagkaaga, Pebrero 26, ginkadtuan si Perez sang isa ka nagpakilala nga Captain Avila, nga ginpadala kuno sang Battalion Commander sang 31st IB agud hibalon kon ano ang mahatag nga bulig sa iya. Tuhtub subong wala pa gihapon mag-abot ang bulig sa pasyente. Plano ni Perez nga magpasaka sang kaso kriminal batuk sa mga suldado nga nagluthang sa iya. AB

Mga upisyal sang rehimeng Arroyo, pormal nga ginkasuhan sa hukmanan sang pumuluyo sa pagpatay kay Rebelyn Pitao

Pormal nga nagpasaka sang kaso sa hukmanan sang pumuluyo ang Merardo Arce Command (MAC) sang Bag-ong Hangaway sang Banwa sa Southern Mindanao batuk sa 12 upisyal, elemento kag ahente sang Military Intelligence Battalion; apat ka upisyal, elemento kag ahente sang Military Intelligence Group X1 sang Intelligence Service of the Armed Forces of the Philippines; kag pinakamataas nga upisyal sang Eastern Mindanao Command, 10th Infantry Division kag Armed Forces of the Philippines para sa pagdukot, pagtortur, paglugos kag pagpatay kay Rebelyn Pitao. Ginkasuhan man sanday Gen. Eduardo Ermita kag ang *commander-in-chief* nga si Gloria Macapagal-Arroyo. Ang kaso nga ginalakipan sang mga krimen sa inaway, krimen kontra sa katawhan kag iban pa nga mabug-at nga paglapas sa tawhanong-kinamatarung pormal nga ginpasaka sining Marso 29.

Ginhambal sang MAC sa isa ka pahayag kadungan sang pagpasaka sang kaso nga ang pagdukot, pagtortur, paglugos kag pagpatay kay Rebelyn Pitao nagaserbi sa interes sang rehimen nga nagagamit sang armadong pwersa sini para lupigon ang mga pagpamatuk, pahipuson ang mga kritiko sini, magsabwag sang hayag nga terorismo sang estado kag tuyuon nga lupigon ang nagabalod nga rebolusyon.

Suno sa imbestigasyon nga ginhimo sang isa ka espesyal nga grupo nga gintukod para sa kaso nga ini, nahibal-an nga nadalahig ang masunod nga mga indibidwal

sa mga krimen nga nasambit:

- Gloria Macapagal-Arroyo
- Gen. Eduardo R. Ermita
- Gen. Alexander B. Yano
- Maj. Gen. Raymundo B. Ferrer
- Maj. Gen. Reynaldo B. Mapagu
- Sgt. Ben Tipait alyas Edmar
- Sgt. Romeo Marcos alyas Adan

Sulao

- Colonel Caguiwa
- Sgt. Romeo Carreon
- Cpl. Helvin Bitang
- Cpl. Orly Pedregosa
- Cpl. Winnie Carampatana
- Sgt. Melvin Punla
- Major Cabanalan
- Sgt. Caballero

Maluwas sa mga ginsambit, nalakip man sa mga akusado ang iban pa nga mga ahente, elemento kag upisyal sang Military Intelligence Battalion sang 10th Infantry Division sang AFP nga kilala sa mga ngalan nga Hagto, Embac, alyas Ariel, alyas Benjak, Reynaldo Desales alyas Jomar, Sergeant Senit kag iban pa nga mga nadalahig sa krimen nga wala pa natumod ang mga ngalan.

Sa partikular, akusado ang mga natumod sa paglapas sa Artikulo 48 sang Protokol 1 sang Geneva Conventions nga nagadumili nga himuon nga target-militar ang sibilyan nga populasyon kag mga pasilidad sang mga sibilyan; sa Artikulo 51, Parapo 2 sang Artikulo 13 kag Parapo 2 sang Protokol II nga nagadumili sang mga akto sang kalakasan kag pamahog nga ang pangunahon nga katuyuan amo ang pagsabwag sang kahadlok sa sibilyan nga populasyon; sa Bahin III, Artikulo



6, Parapo I sang International Covenant for Civil and Political Rights nga nagasaad nga ang mga tawo may basehan nga kinamatarung nga mabuhi, nga isa ini ka kinamatarung nga dapat protektahan sang layi kag wala sang sin-o man mahimo arbitraryong kuhaan sang kabuhi.

Ang pagbista sa nasambit nga mga akusado magasanto sa International Humanitarian Law kag sa rebolusyonaryo nga sistema nga ligal kag

hudisyal, proseso kag layi sang Demokratiko nga Gubyerno sang Banwa kag santo man sa Comprehensive Agreement on Respect for Human Rights and International Humanitarian Law (CARHRIL) kag sa deklarasyon sang NDFP sang pagsunod sa mga probisyon sang Geneva Conventions kag sang Protocol I sini.

Ginasiguro sa mga akusado nga respetuhon ang tanan nila nga kinamatarung sa idalum sang International Humanitarian Law, lakip na ang ki-

namatarung sa paghanda kag pagplatar sang ila depensa, kinamatarung nga mag-angkon sang abugado kag kinamatarung nga iapela ang anuman nga desisyon sang korte.

Samtang, kadungan sang rebolusyonaryo nga ligal kag hudisyal nga mga proseso sang demokratiko nga gubyerno sang pumuluyo, ang mga taktikal nga opensiba sang BHB kag ang pagsulong sang rebolusyonaryong hublag magaserbe sa interes sang hustisya. **AB**

Mga nadalahig sa pagpatay kay Rebelyn, labi nga nagtum-ok sa kaugalingon

May hurubaton nga sa baba madakop ang isda. Nagadaku ang basehan para suspetsahan ang pila sa mga gintumod nga responsable sa pagpatay kay Rebelyn Pitao sang imbestigahan sila sang Commission on Human Rights (CHR) sa Davao City sining Abril 1. Ini bangud sa wala nagasinanto nga mga pahayag nila bahin sa nahibal-an nila sa kaso.

Una nga ginpamangkot ni Atty. Leila de Lima, tagapangulo sang CHR, si Cpl. Helvin Bitang sang Military Intelligence Battalion (MIB). Suno kay Bitang, nahibal-an niya nga patay na si Rebelyn sadtong Marso 5, sang malantaw niya ang balita bahin diri sa telebisyon. Ang matuod halos gab-i na sang Marso 5 nasapwan ang bangkay ni Rebelyn kag aga na sang Marso 6 naglupok sa midya ang balita bahin diri.

Dugang ni Bitang, ginpareport kuno siya sang iya *battalion commander* sadtong aga sang Marso 6 bangud naggwa na ang balita nga ginadalahig siya sa kaso. Ang matuod naguwa lang sa midya ang ngalan sang mga tawo nga gintumod nga may ihibalo sa krimen sadtong Marso 9, isa ka adlaw pagkatapos ini ianunsyo ni Leoncio "Ka Parago" Pitao sa interbyu niya sa pila ka katapu sang midya.

Marso 8 man ang ginahambal nga petsa kon kasan-o nahibal-an kuno ni Cpl. Orly Pedregosa nga ginadalahig siya sa pagkapatay ni Rebelyn.

Ginhambal naman ni Sgt. Martin Punla nga ang trabaho niya amo nga protektahan ang mga VIP ukon importante nga tawo. Sang pamangkuton siya ni De Lima kon sa diin siya sang matabo ang pagdukot kag pagpatay kay Rebelyn, ginhambal niya nga ara sa Tagum City siya sadtong Marso 4 kag Davao City sadtong Marso 5. Pero indi niya kuno matandaan kon sin-o nga VIP ang ginaprotektahan niya sadtong petsa nga ina ukon ano nga tipo kag kolor sang salakyan ang gingamit nila. **AB**

2 gerilya nga gindukot sa Southern Mindanao, nakit-an sa Leyte

Duha sa tatlo ka kadre sang Bag-ong Hangaway sang Banwa (BHB) sa Southern Mindanao nga gindukot sadtong Enero ang nahibal-an nga nahunong subong sa Leyte.

Sanday Ruel Cabales, Catherine Guinoo-Cacdac kag Nelson Carbajosa gindukot sang mga suldado halin sa isa ka balay sa Sityo Pulanglupa, Barangay Ngan, Compostela, Compostela Valley sadtong Enero 26 sang kaagahon. Ara sila sadto para magbulig sa paglubad sang mga kinagamo sa kubay sang masa.

Suno sa ginsumpaang pahayag nanday Cabales kag Cacdac, pagkatapos sila dukuton gindala sila sa kampo sang 10th ID sa Camp Panacan, Davao City kon sa diin isa ka simana sila nga ginpaidalom sa grabe nga tortur kag interogasyon.

Nagpasaka sang petisyon para sa *writ of amparo* ang ila mga pamilya kag gin-aprubahan ini sadtong Pebrero 26. Sigun sa mando sang korte gin-inspeksyon sang mga pamilya sang tatlo ka biktima kag mga myembro sang nagkalain-lain nga organisasyon ang kampo sang 66th IB sa New Bataan, Compostela Valley sadtong Marso 17 apang wala sila makita didto.

Samtang, ginsaylo-saylo sang lugar sanday Cabales kag Cacdac kag pilit nga ginkuhaan sang bidyo nga kuno nagsurender sila. Pilit man sila nga ginpapiirma sang mga dokumento nga nagasaad nga nagsurender sila kag wala gindukot.

Sadtong Marso 25 gindala sila sa pyer sang Suri-gao City kag ginsakay sa isa ka barko pakadto sa Ormoc City. Halin didto gindala sila diretso sa Leyte Provincial Jail sa Barangay Kauswagan, Palo, Leyte kag gin-upod sa isa ka kaso sang *multiple murder* sa



Baybay, Leyte bisan ina ang una nga kahigayunan nga nakakadto sila sa Leyte. Nahibal-an ang ila nahamtingan sang ipahibalo sa Karapatan-Eastern Visayas sang iban nga mga detenidong pulitikal sa *provincial jail* ang pag-abot nanday Cabaless kag Cagdad.

Mabaskog nga ginkundenar sang Hustisya ang ginhimo nga pagpaniplang kag pagpangloko sang 10th ID kag padayon nga pagpamatuk sini nga hilwayon ang tatlo ka biktima bisan gin-aprubahan na sang korte ang petisyon sang ila nga pamilya para sa

writ of amparo.

Samtang ginkumpirma pa sang Hustisya ang balita nga si Carbajosa, ang ikatlo nga biktima, ara sa pag-inakop sang isa ka kapitan sang barangay sa Kapatagan, Digos City.

AB

Pilipinas, ikaanom sa kadamuon sang mga ginpatay nga peryodista

IKAANOM ang Pilipinas sa 14 ka pungsod nga may pinakadamo nga kaso sang pagpatay sa mga katapo sang midya nga wala masilutan ang mga kriminal. Ini suno sa 2009 Global Impunity Index sang Committee to Protect Journalists (CPJ). Ginpahayag ini sang CPJ sa isa ka *press conference* sadtong Marso 23 nga gin-organisa sang Freedom Fund for Filipino Journalists kag ang Southeast Asia Press Alliance.

Baynte'y kwatro na nga katapu sang midya ang ginpatay sa Pilipinas sining nagligad nga napulo ka tuig nga wala pa mahatagan sang hustisya. Bangud sini, ginaduso sang CPJ sa gubyerno nga Arroyo nga maghimo na sang mga kongkreto nga tikang para mahatagan-katarungan ang mga ginpatay nga peryodista kag proteksyunan ang mga katapu sang midya sa pungsod. Ginpanginwala sini ang ginhambal ni Executive Secretary Eduardo Ermita nga maayo kuno nga ginaasikaso ang kaso sang 24 ka peryodista nga ginpatay bangud siling sang CPJ, wala pa sang bisan isa sa mga suspetsado ang nasentensyahan.

Ang CPJ isa ka pangkalibutanon nga organisasyon nga nagasakdag sa kahilwayan sa pagpahayag. Tuig-tuig ini nga nagapagwa sang listahan sang mga kaso sang pagpamatay sang mga peryodista sa bilog nga kalibutan nga wala masilutan ang mga may sala.

Nagapanguna sa listahan sang mga pungsod nga pinakadelikado para sa mga peryodista ang Iraq kon sa diin indi magnubo sa 88 reporter na ang ginpamatay halin sang sakupon ini sang US sadtong 2003.

Ikaduha ang Sierra Leone, ikatatlo ang Somalia, ikaapat ang Sri Lanka kag ikalima ang Colombia.

Prostitusyon sa Bikol, ginapalala sang Balikatan

GINBUYAGYAG ni Sen. Francis Pangilinan nga gab-i-gab-i ginadalhan sang mga babaye ang mga suldao nga Amerikano nga kabahin sa Balikatan *exercises* sa Bicol. Ang impormasyon ginpaabot sa iya sang pumuluyo nga taga-Legaspi City sadtong Abril 1.

Siling sang mga saksi, duha ka beses gab-i-gab-i nagabaton sang walo tubtob napulo ka babae ang mga Amerikano sa ginadayunan nila nga hotel sa syudad. Siling ni Pangilinan, dugang ini nga pamatuod sang kalainan nga dala sang Visiting Forces Agreement (VFA) sa Pilipinas.

Kaangut sini, magaplastar ang senador sang resolusyon para imbestigahan ang paglala sang prostitusyon kag iban pa nga iligal nga aktibidad tuga sang presensya sang mga dumuluong nga suldao sa pungsod.

Ginpakamala man sang GABRIELA, Bayan Muna, BAYAN kag iban pa nga patriyotiko kag demokratikong organisasyon ang paglala sang pagpanghimulos sa kababainhan nga Pilipino tuga sang Balikatan kag VFA.

Mga Fil-Am, batuk sa VFA

NAGALANOG sa US ang mga protesta kontra sa pagpadayon sang US-RP Visiting Forces Agreement (VFA) sang iduso sang mga aktibista nga Pilipino-Amerikano ang pagbasura sa kasugtanan nga ini sa isa ka daku nga rali sa hedkwarters sang US Department of Defense sa Arlington St., Washington D.C. sadtong Marso 21. Ang kontra-gera nga aksyon protesta nga ini nga ginbuylugan sang mga katapo sang BAYAN-USA, GABRIELA Network, Alliance Philippines kag iban pa nga organisasyon sang mga Pilipino-Amerikano kaangut sang ikaanom nga anibersaryo sang pagsalakay kag pagsakop sang US sa Iraq.

Upod ang nagkalain-lain nga organisasyon kag perso-nahe kontra sa mapanggera nga pagsulondan sang US, ginkundenar man sang mga aktibista nga Pilipino-Amerikano ang padayon nga pagpanakop sang US sa Iraq kag Afghanistan kag ang pagsuporta sini sa Israel kontra sa Palestine. Dala-dala sang mga aktibista ang mga himu-himo nga lungon nga nagasimbolo sa mga kaswalti sang gera nga agresyon sang Amerika.

Nagaabot sa 10,000 ang nagtambong sa mobilisasyon nga ini nga amo ang pinakadaku umpisa sang mabutang bilang pangulo sang US si Barack Obama.



Wala sang pulos ang mga resolusyon sang G20

Pareho sang ginalauman, wala sang pulos para sa nagaantus nga pumuluyo sang kalibutan ang mga naisahan sa pulong sang Group of 20 (G20) sining Abril 1-2 sa syudad sang London.

Nagtum-ok ang pulong sang 20 pinakadalagku kag pinakamanggara non nga pungsod sa kalibutan sa problema sang wala sang regulasyon sa pangpinansya nga kapital nga nagbunga sang mga kagarukan kag sobra nga pag-alagwa sang mga transaksyon diri. Gani naisahan sang G20 nga ang pangunahon nga pamaagi sang paglubad sa subong nga krisis amo ang isa ka pangkalibutanon nga sistema sang regulasyon. Apang halos wala sang pulos ini sang ginkaisahan man nga indi pag-istriktuhan ang mga bangko tubtob indi pa napahagahagan ang subong nga krisis.

Pahapyaw lang nga gintum-ukan sang G20 ang mas importante kag yabi nga halambalanon sa problema sang tunay nga ekonomya nga ginabunga sang siklikal nga problema sang sobra nga produksyon sa isa ka bahin kag kakulangan sang konsumo sang nagaantus nga pumuluyo sa pihak nga bahin. Bangud sini, wala sang ginhi mo nga maathag nga solusyon sa pagdausdos sang produksyon, konsumo, negosyo kag



empleyo nga nagawasak sa palangabuhian sang madamo nga pumuluyo sang kalibutan.

Nagapabulag-bulag ang G20 sa kamatuoran nga ang imperyalista nga pagsulondan sang globalisasyon sang “hilway nga baligyaanay” ang siya ang nagatuga sang wala sang pareho nga pag-antus kag pagpamigos sa sobra nga madamo nga pumuluyo sa kalibutan sining mga ulihi nga dekada. Paagi sa pagpatuman sang pagsulondan nga ini ginalapakan sang mga imperyalista ang pungsudnon nga ekonomya, ginasuyop ang mga duna nga manggad, ginahingalitan ang mga masa nga anakbalhas kag ginawasak ang mga produktibo nga pwersa sang mga malakolonya kag atrasado nga pungsod. Kadungan sang pagpamilit nga ipatuman sang madamo nga nagaantus nga pungsod ang globalisasyon nga “hilway nga baligyaanay,” labi pa subong nga nagahugot ang mga imperyalista nga pungsod sa pagpatuman sang nagkalain-lain nga porma sang proteksyunismo. Wala sang ginahimo ang G20 para pungan ini.

Ang pila ka trilyon nga dolyar nga kuno “programa pangpasikad sang ekonomya” nga amo ang pangunahon nga ginapatuman sang US amo ang artipisyal kag manabaw nga solusyon lamang sa depresyon sang pangkalibutanon nga ekonomya. Ginatum-ukan sang US kag UK ang paghatag-prayoridad sa ini nga mga programa kag ginaduso nila nga suportahan ini sang G20 sa pangkalibutanon nga sakop. Ginba-libaran ini sang G20 bangud nagatuga kuno ini sang implasyon. Bisan pa man, ginbilin pa gihapon sa mga indibidwal nga gubyrno

Mainit nga protesta sa pulong sang G20

Ginsumalang sang dalagkuan, malaparan kag mainit nga protesta ang pulong sang mga lider sang G20 nga ginhiwat sa London sining Abril 1 kag 2. Duha ka adlaw nga nagmartsa kag nagkampo sa mga dalanon kag sa sentro sang mga upisina sang mga bangko kag pangpinansya nga institusyon sa London ang linibo nga pumuluyo para pakamalauton ang pulong sang G20. Dalagku nga numero ang naghiwat man sang dungan nga mga protesta sa nagkalain-lain nga syudad sa Europe.

Nag-ululupod ang mga unyon, organisasyon nga maka-kalikasan kag para sa kalinungan, institusyon sa buhat sa kaluoy, estudyante kag iban pa nga aktibista para pamatukan ang krisis sa pangabuhian nga nagahanot sa daku nga mayorya sang pumuluyo sang kalibutan kag pakamalauton ang mga monopolyong kapitalista kag nagapamuno nga imperyalista sa responsibilidad nila diri. Ginaduso nila nga dapat una nga buligan ang pumuluyo sa baylo nga ang mga responsable sa krisis.

Ginkundenar nila ang paggamit sang kamot nga salsalon para pungan ang kinamatarung sang pumuluyo nga magpahayag sang ila demanda. Isa ang napatay kag madamo ang napilasan kag ginaresto sa mga nagprotesta.

AB

ang pagdesisyon sa ini nga mga tikang.

Para kuno makabulig sa mga pungsod nga naigo sang subong nga krisis, nangako ang G20 nga magpatuhaw sang \$1.1 trilyon nga dugang nga pondo nga uyan sang International Monetary Fund (IMF). Ipautang kuno ini sa mga nagaantus nga pungsod. Apang ang matuod, halos 90% si-ni itigana sa pinakamanggaranon nga pungsod, kalakip ang mga ara sa G20, samtang mga 10% lamang ang tulungaon sang labi nga madamo nga nagaantus na nga mga pungsod. Malala pa, ang imol nga pungsod nga nagasalig nga makabenipisyo diri kina-hanglan mag-agi sa pinkakahugot nga kondisyon nga ginapapanaog sang IMF nga nagakahulugan sang desaysibo nga kontrol sang imperyalista nga ahensya sa ekonomya sang mga nagautang nga pungsod. **AB**

Linibo ka pamilya, pagapalayason sang NorthRail Project sa Hunyo

MAGALAB-OT sa 18,455 ka pamilya nga nagapuyo subong sa higad sang daan nga riles sang Philippine National Railways sa City of Malolos sa Bulacan tub-tub sa Mabalacat sa Pampanga ang pahalidon pag-abot sang Hunyo sini nga tuig samtang ginatapos ang 50-kilometro nga Section 2 sang \$1.317 bilyon nga proyektong NorthRail Project. Ang paghawan sang dalan nga ini kaangot sang moderno nga proyekto nga *mass transit* nga magasugpon sa Metro Manila sa Diosdado Macapagal International Airport Clark Freeport sa Pampanga.

Sa pihak sang promisa ni Federico Laxa, *general manager* sang National Housing Authority, nga isaylo sa mga *housing unit* sang gubyerno ang mga maapektuhan sang proyekto nga ini, madamo pa gihapon sa mga nagapuyo sa higad sang riles ang nagakabalaka sa madangatan nila sa mga *relocation site*. Indi lipod sa ila ang madamo nga reklamo nahanungod sa kakulangan sa serbisyo pareho sang kuryente, tubig kag kasilyas, luwas sa malayo ini sa ila palangabuhian.

Kon makumpleto ang proyektong NorthRail, ini na ang magaguwa nga pinakadaku nga proyekto sang gubyerno nga nagtuga sang pinakamalapad nga dislokasyon bangud naglab-ot sa 41,000 pamilya ang apektado sini. Sakop sini ang mga lugar sa mga syudad sang Malabon, Caloocan kag Valenzuela sa Metro Manila; Meycauayan, Marilao, Bocaue, Balagtas, Guiguinto kag Malolos sa Bulacan; kag Apalit, San Simon, San Luis, City of San Fernando, Angeles City kag Mabalacat sa Pampanga. May nasaylo na nga 23,000 ka pamilya halin sa Section 1 halin sadtong 2007.

Arroyo, ginkundenar sang mga migranteng mamumugon

MABASKOG nga ginkundenar sang Migrante International si Gloria Arroyo sa padayon nga paghimo sang mga kasugtanan sa iban nga mga pungsod bilang paagi sang pagresolba sa nagataas nga numero sang mga migrante nga nawad-an sang trabaho. Imbes nga pangitaan sila sang mga trabaho sa iban nga pungsod, dapat nga tagaan sang igtalupangod sang gubjernong Arroyo kon paano makatuga sang mas madamo nga trabaho sa Pilipinas.

Siling sang Migrante International, imposible na nga makabalik sa mga trabaho ang Pilipino nga mamumugon bangud nagsira na ang mga kumpanya sa madamo nga pungsod tuga sang malubha nga krisis pang-ekonomiya. Suno sa listahan, naglab-ot na sa 19,936 ang napahalin sa trabaho mga migrante. Partikular sa pungsod Taiwan, 6,528 na ang mga Pilipino nga nadulaan sang trabaho suno sa rekord sang Manila Economic and Cultural Office sadtong Oktubre 2.

Ginapamatukan man sang Migrante ang plano sang Armed Forces of the Philippines nga kuhaon ang linibo nga nga naga-pauli nga migrante nga napahalin sa trabaho nga bangud himuon lamang nila ini nga bayaran kag pasista nga suldado nga magaserbi lamang sa interes sang daku nga burgesya kumprador kag iban pa nga nagahari nga sahi. Isa ka insulto kuno sa ginatawag nga mga "bag-ong bayani" sang pungsod nga himuon lamang silang tinawo sang militar.

DPRK, madinalag-on nga nagpalupad sang satellite

GINDAYAW sang Partido Komunista sang Pilipinas ang madinalag-on nga pagpalupad sang Democratic People's Republic of Korea (DPRK) sang *communication satellite* sa kahawaan sadtong Abril 5. Kadungan sini, ginkundenar sang PKP ang US kag mga alyado sini sa pagpaguwa sini nga *missile test* ang nasambit nga pagpalupad kag sa aktwal nagasulsol sang inaway ang DPRK.

Ang pagpalupad sang *satellite* isa lamang sa mga abanteng teknolohiya nga uswang sang DPRK nga nagatinguha nga pangapinan ang independensya batuk sa pagpang-atake sang US kag iban pa nga imperyalistang gahum. Madinalag-on nga nagapauswang ang DPRK sang industriya sang armas nga nakabase sa teknolohiyang nukleyar, nga anay monopolyo sang mga imperyalista. Sa pagpalupad sang DPRK sang *communication satellite*, ginwasak man sini ang imperyalistang monopolyo sa pangkalibutanon nga pagpalapnag sang propaganda kag mensahe gamit ang moderno nga midya.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XL No. 7
Abril 7, 2009
www.philippinerevolution.net

Editorial

Padayon nga nagapadihut si Arroyo para magkapyot sa gahum

Nagahimo si Gloria Arroyo sang mahigko kag makahas nga padihot sa nagakaladasma niya nga pagpangita sang pamaagi para padayon nga magkapyot sa poder pagkatapos sang 2010. Mapa-*cha-cha* man ukon mapa-eleksyon, may mga reserba nga baraha si Arroyo nga tanan naman nabisto.


Bisan makapila ka beses na nga ginsikway sang pumuluyo kag nag-atras na pati ang pila niya ka alyado, tuso nga ginaduso gihapon sang sakon sa gahum nga mga idu-ido ni Arroyo ang *cha-cha* sa Kongreso. Ginapabugal sining karon lang sang partido KAMPI ni Arroyo nga baynte ka pirma na lang ang kinahanglan para pormal nga maaprubahan ang resolusyon ni Rep. Luis Villafuerte agud bag-uhon ang konstitusyon sang 1987 paagi sa pagtransporma sang Kongreso pakadto sa *constituent assembly* (*con-ass*), magpartisipar man ukon indi ang mga senador.

Katuwang sini, nagpadihot man si Speaker Prospero Nograles sang resolusyon sa Manubo nga Panalغان para ibasura ang probisyon sa konstitusyon nga nagadumili sa dumuluong nga pagpanag-iyang mga kadutaan kag negosyo sa pungsod. Ang resolusyon nga ini ginapaguwa niya nga isa ka "simple nga pang-ekonomya nga resolusyon lang" bisan ginasurender sini ang pungsodnon nga patrimonya kag interes. Ginapamilit niya nga ipasar na lang ini sang Manubo nga Panalغان bilang ordinaryo nga lehislasyon. Katuyuan sini nga hawanan ang dalan para sa iban pa nga resolusyon pangunahon na ang pagbag-o sa sistema

sang gubyrno pakadto sa parlamentaryo nga magahatag-dalan sa pagpabilin ni Arroyo sa poder bilang puno nga ministro.

Ang ginalauman nga pagpamatuk sang Senado kag iban pa nga organisasyon kag personahe sa *con-ass* ipabasura sa Korte Suprema, gamit ang kontrol ni Arroyo sa mayorya sang mga mahistrado. Hayag katama ang katuyuan sang resolusyon nga ginaduso ni Villafuerte, labi na ang nagapanguna sa pagpangita sang mga pirma para diri amo ang mga kongresista nga anak ni Arroyo nga sanday Jose Miguel kag Diosdado.

Pakuno-kuno nga nagadistansya ang Malacañang sa mga padihot nga *cha-cha* sang mga anak kag idu-ido ni Arroyo sa Kongreso. Nakita sini nga samtang labi nga ginapamilit ang *cha-cha* labi lamang nga nagakahamulag ang hubon Arroyo. Pero indi man kuno



Mga tampok sa isyu nga ini...

Mga kadalag-an batuk sa Oplan Bantay Laya 2
PAHINA 3

Isa ka biktima sg pasista nga pagpamatay kada simana
PAHINA 8

Wala pulos ang mga resolusyon sg G20
PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com